




Itsaq kalaallit Sassuma Arnaa upperisimavaat. Sassuma Arnaa immap naqqani najugaqarpoq, immap uumasuinut tamanut naalagaalluni, sunalu tamaat ilisimallugu. Tasamannga inigisaminiit puisit, arferit timmissallu piniartut piniagassaat piniarneqarsinnaasunngorlugit qaffakaatittarpai.


Taamaattumik Sassuma Arnaanik taaguuteqartippaat. Kisiannili inuit eqqortumik inuunngikkaangata Sassuma Arnaa kamattarpoq piniagassallu qaffatsinnaveersaalertarlugit. Taamaasigaangat inuit angakkumik aallartitsisariaqartarpuit, Sassuma Arnaata nujarsui inuit eqqunngitsuliaannik mingussimasut salitsikkiartorlugit. Imagooq pissaaneqartigaaq angakkunit pikkorinnerpaaginnarnit immap naqqanut pulaarneqarsinnaalluni.

Angakkoq tassaavoq immikkut piginnaanilik, ataqqisaasoq, aammali ersigisaasoq. Napparsimasut ajorunnaarsissinnaavai, siunissamilu pisussat oqaatigisinnaallugit. Aamma arnanik qaqtigortumik angakkoqartarsimavoq, taakkualugooq angutinit piginnaaneqarnerusarput.



Maanna tusassavarput arnannguaq utoqqaq qanoq ililluni Sassuma
Arnaanut pulaarsimasoq, suullu ersinartut naalliunnartullu
misigisariaqarsimagai.

Arnatoqannguaq taanna uinilu nunaqarfeerannguami najugaqarput.
Qanga tamarmik angakkuusimagaluarpus, massakkulli utoqqalinermit
angakkutut piginnaaneerussimapput. Maanna angajoqqaat
aallaraangata taamaallaat meeqqanut paarsisutut atuutilersimapput.
Taava paarsigaangamik angakkutut piginnaanituunnguatik atortarpaat,
tassa meeqqat nipiliorpallaaleraangata naqqup ujarattai aalatilersarlugit.
Meeqqallu ersilersarput nipaarutiivillutillu.



Ukiut ilaanni ukiorluttorsuusimavoq. Imaq tamavimmi sikuvoq,
piniartullu piniarsinnaajunnaarput inuillu kaalerlutik.

Ullut ilaanni issittorsuugaa angutitoqannguaq uunnassimaarniarluni
amerrik qipilluni illermi nalavoq. Nuliannguakasia saniani issiavoq
qullini ippammiittooq taqqissortarlugu qamitinnaveersaarlugu.

Pulaartussamik ilisimasuuteqanngillat.


Tassanngaannarli piniartorsuaq Qujaavarsi ernini
Qujaaversiaraq ilagalugu iserput. Piniartorsuarlu
oqarpoq: – Sanna sikorsuaq angakkuarlugu
aserorteqqullugu qinnuigiaqtorlusi
ungasissorsuarmiit aggerpugut.
Nerisassaminernik akissatsinnik
nassarpugut.

- Aa, naamik, utoqqalivallaqigatta angakkuarneq sapilernikuuvugut, angutitoqaq oqarpoq.
- Tusaamagatsiguuna angakkuarlusi naqqup ujarattai pissikalatittarisi meeqqallu ersiornermik qimarrattartut. Taamaasiorsinnaagussi aamma siku peersissinnaassavarsi, piniartorsuaq oqarpoq.
- Naamik, sapivipparput. Siku peersissinnaanngilarput, utoqqaavallaqaagut. Nukeerunniukuuvugut, utoqqaat akipput.
- Ernerma piniarneq ilikkarlugu nuannersiseruttora imarput tamakkiviluni sikuvoq. Maanna susassaaleqinermik kipiluttunaqaaq. Nipangissanngilaq angakkuarlusi sikuerseqqullugu qinnuigar-toqqullusi oqaluffigalunga. Qaa, misilikkaluarniarsiuk! Piniartorsuarlu nipangersimariarluni nangippoq:
- Aammami erniinnaq nerisassaarutissaagut.

Piniartorsuaq utoqqarnut uteriisertuarpoq, kiisa arnatoqannguaq oqaannarpoq: – Misilikkaluarsinnaavarput, immaqa iluatsitsissanata, ilami utoqqaqigatta. Utoqqannguit sikorsuup aserorternissaa angakkuarlugu misilinnialermassuk pulaartut nuannaajallakkamik.

- Kisianni unneseeqqaarlugu, utoqqaat oqarput.
- Taarsinissaa utaqeqqaarlugu!





Pissanganartumik pisussaqartillugu erinit sannartaqaaq.
Qujaavarsiaraq utaqqikatangaarami aatsaat taamak ualimik
takitigisumik misigisaqarpoq.

Kiisaana unnullartoq. Utoqqaat qulleq qameqquaat,
angakkuarniaraannimi taarluinnartariaqarmat.

Qulleq qamimmat illup ilua taartuinnanngorpoq, utoqqaallu
serrallutik aallartipput. Taannaqami serralerpuit, serralerpuit.
Taamaalluni angutitoqqap nuliannguakkuluni aperaa:

- Malugisaqarpit?
- Naamik malugisaqanngilanga. Serraqqilerput.
- Malugisaqarpit? Uiata apereqqippaa.
- Naamik malugisaqanngilanga. Qanormi aamma taamak
utoqqaatigaluta.

Suallakkunnanngilagut, nulia akivoq. Serraqqilerpullu.

- Massakkummi malugisaqarpit? Uiata apereqqippaa.
- Asuki..., nuliata akivaa. Taamak akivoq malugisaqalaarami.